

ՀԱՄԱՁԱՅՆԱԳԻՐ

Հայաստանի Հանրապետության Կառավարությանն առընթեր ֆիզիկական կուլտուրայի և սպորտի պետական կոմիտեի և Բելառուսի Հանրապետության սպորտի և տուրիզմի նախարարության միջև ֆիզիկական կուլտուրայի և սպորտի բնագավառում համագործակցության մասին

Հայաստանի Հանրապետության Կառավարությանն առընթեր ֆիզիկական կուլտուրայի և սպորտի պետական կոմիտեի և Բելառուսի Հանրապետության սպորտի և տուրիզմի նախարարությունը, այսուհետ՝ Կողմեր,

ընդունելով, որ ֆիզիկական կուլտուրայի և սպորտի բնագավառում համագործակցությունը երկու պետությունների միջև բարեկամական հարաբերությունների զարգացման և ամրապնդման կարևոր և անհրաժեշտ տարրերից մեկն է,

ձգտելով հիմքեր ստեղծել Հայաստանի Հանրապետության և Բելառուսի Հանրապետության միջև փոխհարաբերությունների ընդլայնման և խրախուսման համար,

կնքեցին սույն Համաձայնագիրը ներքոհիշյալի մասին.

Հոդված 1

Միջազգային սպորտային համագործակցությունն ամրապնդելու նպատակով Կողմերը կհամակարգեն իրենց գործունեությունը՝ միջազգային սպորտային և օլիմպիական շարժման հարցերով հանդիպումներ և խորհրդակցություններ, անցկացնելու, միջազգային սպորտային մարմիններում իրենց գործունեությունը համակարգելու միջոցով:

Կողմերը կաջակցեն հայ և բելառուս մարզիկների, մարզիչների, մարզական շարժման կազմակերպիչների մասնակցությանը մրցումներին և միջազգային մարզական միջոցառումներին, որոնք կազմակերպվում են Կողմերի պետություններում:

Կողմերը կխրախուսեն ուսումնամարզական հավաքների կազմակերպումը, ազգային, հավաքական և ակումբային թիմերի տարբեր մարզաձևերով համատեղ մարզումները Կողմերի պետությունների մարզական բազաներում՝ նպատակ ունենալով բարձրացնել պատրաստվածությունը և մարզական վարպետությունը:

Հոդված 2

Կողմերը կաջակցեն մարզական մասսայական միջոցառումների կազմակերպման, բնակչությանը ֆիզիկական կուլտուրայով կանոնավոր զբաղվելու ներգրավման բնագավառներում փորձի փոխանակմանը:

Կողմերը կփոխանակեն գիտամեթոդական տեղեկատվություն ֆիզիկական կուլտուրայի և սպորտի միջոցով բնակչության կազդուրման և հանգստի կազմակերպման հարցերի մասին:

Հոդված 3

Կողմերը կաջակցեն մարզչական և գիտամանկավարժական կադրերի պատրաստմանը, վերապատրաստմանը և փոխանակմանը:

Կողմերը կնպաստեն հայ և բելառուս գիտնականների, մասնագետների մասնակցությանը երկու պետություններում սպորտի հարցերով կազմակերպվող համագումարներին, գիտաժողովներին, սեմինարներին:

Կողմերը կաջակցեն գիտական աշխատությունների, սպորտի բնագավառում բարձրագույն վարպետության նորագույն ձեռքբերումների, սպորտային կանխատեսման, բարձրակարգ մարզիկների պատրաստման համար բժշկականսաբանական ապահովման մեթոդների և ժամանակակից գիտական տեխնիկայի և սարքավորումների օգտագործման մասին տեղեկատվության փոխանակմանը:

Հոդված 4

Կողմերը, հաստատելով իրենց հավատարմությունը արդարացի խաղի սկզբունքներին, համատեղ գործողություններ կիրականացնեն մրցումներին և մրցումներից դուրս մարզիկների պատրաստվելու ընթացքում արգելված միջոցների և մեթոդների օգտագործման դեմ:

Հոդված 5

Կողմերը կնպաստեն փորձի փոխանակմանը մարզակառույցների կառուցման և շահագործման, մարզահագուստի և մարզագույքի արտադրության և ձեռքբերման բնագավառում:

Հոդված 6

Կողմերը կնպաստեն մարզաձևերի ֆեդերացիաների, օլիմպիական հերթափոխի կենտրոնների, սպորտային ուղղվածության գիտական և ուսումնական հաստատությունների միջև ուղիղ կապերի հաստատմանը, որոնք կիրականացվեն փոխադարձաբար ընդունելի պայմաններով:

Հոդված 7

Համագործակցությունն արդյունավետ իրականացնելու նպատակով Կողմերը պայմանա վորվեցին ընդունել մարզական փոխանակումների ամենամյա ծրագիր, որը կնշակեն և կստորագրեն Կողմերի միջև նախապես համաձայնեցված ժամկետներում:

Հոդված 8

Կողմերը սահմանում են, որ սույն Համաձայնագրի հոդվածներում շարադրված ֆիզիկական կուլտուրայի և սպորտի բնագավառում համագործակցության ձևերը կիրականացվեն փոխադարձ հարգանքի, հավասարության, Կողմերի իրավունքների և պարտականությունների պահպանման պայմաններով: Սույն Համաձայնագրի իրագործման ձևը, ծրագիրը և ֆինանսական պայմանները կորոշվեն Կողմերի պետությունների սպորտի և մարզական կազմակերպությունների կառավարման համապատասխան մարմինների կողմից՝ խորհրդատվությունների միջոցով:

Հոդված 9

Սույն Համաձայնագիրն ուժի մեջ է մտնում Կողմերի կողմից դրա ուժի մեջ մտնելու համար անհրաժեշտ ներպետական ընթացակարգերը կատարելու մասին վերջին գրավոր ծանուցումը ստանալու օրվանից և գործում է 4 (չորս) տարվա ընթացքում: Նշված ժամկետը լրանալուց հետո սույն Համաձայնագրի գործողությունը ինքնաբերաբար երկարաձգվում է հաջորդ չորսամյա ժամանակահատվածով, պայմանով, որ Կողմերից ոչ մեկը այդ ժամկետը լրանալուց առնվազն 6 ամիս առաջ դիվանագիտական ուղիներով, գրավոր ծանուցմամբ չի հայտնի դրա գործողությունը դադարեցնելու իր ցանկությունը:

Սույն Համաձայնագրի գործողության դադարեցումը չի ազդի սույն Համաձայնագրի գործողության ժամանակ սկսված բոլոր ծրագրերի և նախագծերի կատարման ընթացքի վրա, եթե Կողմերը այլ բան չպայմանավորվեն:

Սույն Համաձայնագրի ուժի մեջ մտնելու օրվանից դադարում է 1993 թվականի հոկտեմբերի 26-ին Սանկտ - Պետերբուրգում ստորագրված Հայաստանի Հանրապետության և Բելառուսի Հանրապետության միջև ֆիզիկական կուլտուրայի և սպորտի բնագավառում համագործակցության մասին Համաձայնագրի գործողությունը:

Կատարված է Երևան քաղաքում 2006 թ. հոկտեմբերի 23-ին, երկու բնօրինակով, յուրաքանչյուրը՝ հայերեն և ռուսերեն. ընդ որում՝ բոլոր տեքստերն էլ հավասարազոր են: Սույն Համաձայնագրի դրույթները մեկնաբանելիս տարաձայնություններ ծագելու դեպքում նախապատվությունը տրվում է ռուսերեն տեքստին:

Համաձայնագիրն ուժի մեջ է մտել 2007թ. մայիսի 7-ից